

La mare de San Piero

Secondo la leggenda, il cattivo tempo che si manifesta verso la fine di Giugno, sarebbe provocato dalla mamma di S. Pietro. Ella ogni anno esce dall'inferno 15 giorni: una settimana prima e una settimana dopo l'onomastico del figlio (29 Giugno). Questo permesso le è stato concesso dal Signore per consolare San Pietro disperato dopo aver fallito il tentativo di tirarla su dalle fiamme con una foglia di radicchio: l'unica carità che sua madre aveva fatto in vita.

La mare de S. Piero, come viva, l'era senpre stata na femenàta: egoista, invidiosa, cativa e, dopo morta, no la podhea ndar altro che a l inferno.

Un dì che S. Piero l'é ndat in Paradiso e no l'à trovà so mare, l'é corest da par tut, vardando de qua e de là, parché lu al podhea ndar dove che l voéa.

L'à vardhà inte l Paradiso e inte l purgatorio, ormai no ghe restea altro che l inferno, ma lu no l credea che la fosse là. E invezhe l'era propio là.

Alora S. Piero l'é corest da l Signor e co le lagrime a i oci lo à pregà de salvar so mare tirandola fora da l inferno.

Al Signor al ghe a rispondest:

“Mi me despiase tant, Piero, ma ti te sa che no se podarìa: però ciapa l libro in man, quel de i conti de i omeni, e vardha se te se bon de trovar, in mezho a tante cativerie fate da to mare, anca qualche opera bona”.

San Piero l va, al ciàpa l libron dei conti de i omeni e vardha che ti vardha, no l'é stat bon de trovar altro che cativerie.

Ormai l vea pèrs ogni speranzha quando ghe capita soto i oci na picola nota scritta su n canton de na pagina. Al vardha e al ledhe: “Carità de na foia de radicio”

Tut content, Piero al core da l Signor co l libro in man par mostrarghe l'opera bona fata da so mare.

Al Signor, content anca lu par S. Piero, al ghe dis:

“Ciapa na foia de radicio, trova to mare e dighe che la se piche a la foia e ti tirala su”. S. Piero, content come na pasqua, al va a l inferno e al fa come che ghe à dita al Signor. Ma l'é sucèss na roba brutta, parché quando che so mare, picadha ala foia de radicio, la era ormai alta sora l inferno, tiradha su da so fiol, la se à inacort che le se era picadhe àle so cotole anca tute le altre anime danadhe, la se à intavanà e stordhèst come na bissa.

L'à scomizhià anca a sgorlar forte, co la man libera, le so cotole par destacàr le altre anime, pi invidiosa e rabiosa de senpre. Ma intant, co tuti quei sgorlament la foia de radicio la se à rot e la mare de S. Piero la é cascadha da novo e par senpre inte l inferno.

Al Signor, viste come che le era ndate le robe, par consolar S. Piero, al ghe à fat la grazhia che so mare la torne fora da l inferno na volta a l ano e la stae fora quindese dì: sète dì prima e sète dì dopo la so festa (29 Giugno).

Ma quella femenata la continua a combinàrghen cossì tante ogni ano: vent, tenporai, stravaganzhe, che no la ghe fa pi pecà a nessun e tuti no i vede l'ora che la torne dentro co i so conpari!